

YIPIYSES

Pol Yipiyses Biynimb Kuyip Minj Tikak

Minim Nind Niņep

Pol Yipiyses biynimb Krays ker mindeyak gok kuyip minj tikak biy; Gor kuyip Jiwda gok, Jiwda mer gok di Krays yip jimñiy ayek, Gor biynimb kiñiņ nokom mindpay rek angrep gen, penpen angiy asik keykey ma ayniņgiy angiy tikak.

Minim Ar Keykey Mindip Rek:

Minim nind angak ak mindip, chapta 1:1-2.

Krays biynimb nuk gok kond mindrep gip minim ak mindip, chapta 1:3–3:21.

Mindyņgipim rek ma mindenimimb; Krays biynimb nuk kim kisenimb mindpim ak niņiy, Krays miñ gip ar ak nep ginimimb angak minim ak mindip, chapta 4:1–6:20.

Minim ang jiwak minim day won ak mindip, chapta 6:21-24.

1 ¹Yand Pol, Gor nep angək bi Jiysis Krays minim dand amemb ak mindpiyn. Nimbip Yipiyses biynimb Krays nup chingrep giy mindpim gok minj tiksi piyn.

²Biyomb chin apiy miņay ak nimbip simb niņiy kond minder, mindrep ginimimb.

Jiysis Krays Nup Yokek Apiy, Chinup Dak

³Biyomb chin Jiysis Krays Nop anup tep angjun. Ñinuk nup yokek apiy chinup dek mey, nup chingon, chinup direp yimb gek mindrep gipun.

⁴Miñmon ma alwol gayak ñin ak chinup gos niņiy angak, “Ñiyand Krays nup yoken am kuyip dek, biynimb suņ-tep yand gok mindeniņgambay angak.” ⁵Ñin kun anep angak, “Ñiyand Krays kuyip dek, ñapan yand gok mindey, yip tep giniņgamb angak.” ⁶Kun angiy, Ñi mapin nuk ak

monmon yokek apiy, chinup di Nop ñin ar ayak ak mey, tep gakniñ yimb nup ak dand aranjun.

⁷⁻⁸Jiysis Krays likañ yapiy kumak rek, kim amningambun. Gor bi tep yimb ak, tap siy tap timey gipun gok niñiy kirgiy, Ñinuk nup monmon yokek lum biy apiy kumiy chinup dip. Bi gos tipangiy niñimb kun ak, ⁹Ñinuk nup yokningayn angiy niñyĩngip rek yokek awak ak niñbun. ¹⁰Minim bap kunep angay angak, “Ñin angaypiyn ak apek, Ñiyand ak tap semb biyoñ man biy, tap yerip yerip gaynik rek, mañgiysek kond mindeningamb angak.”

¹¹Pen key niñayak rek, chin miñiy Krays nup chĩngiy, Gor biynimb nuk yimb gok mindpun. Yerer gip ak nuk key niñayak rek nep gip. ¹²Nuk gak kun ak, chin biynimb Krays nup nind gosimb niñnuk gok, Nop nup yimb ak dand aranjun. ¹³Pen nimb kunep minim tep ak niñiy nup dem mey, Kawnan nuk ak yokek ap nimb yip mindip. ¹⁴Kawnan nuk chinup yokip kun ak yikop ma yokip; kuyip pisnep dipiyn rek, kisen dand amningayn angiy yokip. Kun ak mey, yimb nup dand aranyĩng nep mindonjun.

Pol Gor Nup Angniñiy, Kuyip Gos Tep Ñinimin Angak

¹⁵Kun ak nimb nind Jiysis nup diy, biynimb nup gok kuyip wasemb aypik ak niñiy, ¹⁶yand sakiy ma giy, nimbip nen Gor nup angniñyĩng, tep angyĩng mindpiyn. ¹⁷Jiysis Krays Nop nup per angniñiy apiyn, “Kiyk Kawnan nand ak yip nep mindpay rek, gos tep ak ñenimin, amemb owep nand ak niñrep yimb giniñgiy. ¹⁸Nand kuyip diniñg, Krays nup yokey apiy kuyip dek, mindrep yimb giniñgambay angiy dinak ak mey; kuyip gos tep ñenimin, giniñgamban kun ak niñiy tep gakniñ mindeningiy. ¹⁹Nand Biyomb key yimb; biynimb nip dipay gok kuyip, kond mindrep yimb gipan ak niñniñgiy apiyn.”

Nimb niñbim: Biyomb chinup kond mindip kun ak key yimb mindip. ²⁰Krays pisnep kumek nuk gek tikjakiy, am ñin yipund kind nuk okok ken mindip. ²¹Nop yip am bisgip rek, nuk kunep Biyomb kun ak key yimb mindip. Biyomb man ar biy mindpay rek mer; enjol biyomb mindpay rek mer; Seytan kichekiy tap okok biyomb mindpay rek mer; pen biynimb yomb nind mindyĩngipay gok, biynimb yomb kisen mindeningambay gok, yimb kiyk kayañ mindek; yimb nuk ak yiy ar biyoñ mindakniñ, mañgiysek beñ nuk okok mindeningambay. ²²⁻²³Nop biynimb tap okok mañgiysek beñ nup okok ayak. Pen chin biynimb nuk gok, nup korip sap yomb namb biyañ rek piñiy, chinup piñiy kus kus gip ak mey, pisnep di jimñimb.

Krays Nep Gek Mey, Kim Amjun Rek Ayip

2 ¹Tap siy tap timey giyĩngipim rek Gor yip jimñiy mindep rek ma ayak ak pen; Krays gek nuk yip jimñiy mindpim. ²Nind ñin kun ak

Seytan kichekiy tap gok ap bak ay mindey, Gor nup minim ak kirpay rek ak giyĩngipim. ³Chin mangiysek kun ak rek nep giyĩngipun. Gos chin key niyĩngipun rek giyĩng, gos gunap key niyep rek ma ayek, biynimb yikop gok, yiwur yomb ak kond mindpay rek ak, chin giyĩngipun.

⁴⁻⁵Kun ak chin Gor yip mindep rek ma ayek, nuk bi biynimb simb niyimb ak, chinup simb niyiy, Ñinuk Krays nup yokek apiy, chinup angyiy kumiy, Gor yip di jimĩiy ayek mey, perper mindenjun rek ayip. ⁶Krays kumak ak pen, Nop gek tikjakiy semb biyoŋ amnak. Pen Nop niyek, chin Ñinuk yip jimĩiy kumiy tikjakiy mindpun ak mey, chinup Ñinuk yip angyayip miñmon tep nuk biyoŋ.

⁷Pen chinup simb niyiy Ñinuk nup yokak kun ak, biynimb gok nup per, bi tep key yimb biynimb simb niyimb ak niyĩngiy angyiy, gak. ⁸Nimb Krays nup gosimb niyem nimbip dip ak, kilis chin key gon chinup dip angyiy ma angnimimb. Gor nuk nep chinup simb niyiy Ñinuk Krays nup yokek apiy, chinup di Nop yip jimĩiy ayek, biynimb nuk mindpun. ⁹⁻¹⁰Pen chinup dek, biynimb gok kuyip direp giyĩng mindrep giningambun ak, ginimimb angak rek nep giningambun. Kun ak yimb chin key dand aranjun rek ma ayingamb.

Krays Biynimb Jiwda Gok Yip, Jiwda Mer Gok Yip Di Jimñak

¹¹Nimb niyimbim: nind Gor nup gosimb ak ma niyĩngipim. Biynimb yand Jiwda gok kumbak tikiy, nimbip angyiwiy angyingipay, “Biynimb sakiy, kumbak ma tikpay gok angyingipay.” Pen kumbak tikpun gos niyiy apay kun ak, Gor biynimb nuk ma mindpay. Nimb miñiy Krays nup chingiy mey, Gor biynimb nuk yimb mindpim. ¹²Pen nimb nind Gor biynimb nuk ma mindiy, minim nup niyĩngipay kind ak ma mindiy, biynimb yand gok diniyayn angak minim ak ma niyiy, biynimb yikop gok gipay rek nep gi mindyĩngipim. ¹³Nimb par okok mindiy, nup ker mindenimimb rek ma ayak. Pen miñiy Krays likañ nuk yapek kumak rek niyiy, nup chingiy biynimb nuk mindpim. ¹⁴Kun ak nuk kumak rek, chin Jiwda gok, Jiwda mer gok miluk niyiy, penpen giyĩngipun wariy ak timbwaliŋ yokiy, di jimĩiy ayek mindpun. ¹⁵⁻¹⁶Jiwda low minim kumbak tikep angyingipay gok mangiysek kirgiy mey, Jiwda kiñiy ak key, Jiwda mer kiñiy ak key ma mindpun. Jiysis kumak rek, chinup Gor yip di jimĩiy ayek mey, chin biynimb nuk gok kiñiy nokom mindpun. ¹⁷⁻¹⁸Nind keykey yimb mindyĩngipun ak pen; Krays minim tep Gor yip jimĩiy mindep ak dand apiy, nimbip biynimb paryomb okok rek mindyĩngipim gok angyĩiy, chin Jiwda maŋ okok mindyĩngipun gok angyĩiy gak. Kinjeŋ chinup ar nokom pindip kun ak, Bapiy yomb ker amjun rek ayip. Pen Kawnan nuk ak kuŋay ma mindip; nokom mindip ak diy mey, jimĩiy mindpun.

Chin Krays Ker Mindpun Gok Gor Korip Nuk Rek Mindpun

¹⁹Kun ak miñiy biynimb miñmon key okok nimb jiwapiy mindpay rek ak ma mindpim: biynimb ar okok tapay rek ma mindpim; Gor biynimb

nuk nindnimb gok yip yingong giy, biynimb nuk yipund giy mindpun. 20-21 Kun ak chin Gor nup angniņep korip ak rek mindpun. Jiysis korip sap di mindep yomb namb biyaņ mindip. Bi Gor minim anġep gok sek, bi Jiysis minim dand amemb gok sek korip sap siskoy titumbis okok piņiyipay rek ak mindpay; korip boņg piņiy kus kus gipay rek ak nimb mindpim. 22 Kun ak Gor Kawnan nuk ak, nimb Yipiyses biynimb Krays ker mindpim gok, di chin biynimb gunap nup ker mindpun gok yip di jimņiy ayek, korip miņgan tep nuk ak mindniņg gisap.

Pol Krays Minim Tep Ak Jiwda Mer Gok Kuyip Angņak

3 1 Yand Pol, Krays nup woņg giņiyiņg, nimbip biynimb Jiwda mer okok angņirangen, Jiwda gunap yip miluk niņiy kalambis ayey mindpiyn. 2 Pen Gor yip simb niņiy diy, nuk nep anġek nimbip angņirapiyn ak; niņbim rek ayip. 3 Minim nuk ma niņyingipay gunap, Gor gek day niņnik ak, nimbip miņj tikpiyn. 4 Nimb minim tikpiyn kun gok niņiy mey, Krays minim tep nup niņbiyn rek ak niņniņgambim. 5 Gor Kawnan ak chinup bi Gor minim anġep gok sek, bi Jiysis minim dand amemb gok sek gos ñek, minim nind ma niņyingipay ak niņrep gipun. 6 Pen minim kun ak kun giy mindip: miņiy Krays apek, Jiwda biynimb gok sek, Jiwda biynimb mer gok sek minim tep angayak ak dey mey, kuyip di jimņiy ayek; biynimb kiņiņ nokom rek mindpay.

7 Gor Biyomb key yimb. Yip simb niņiy, Ñinuk Krays nup monmon yokek apiy, yip diy kond mindakniņ, woņg nup ak giy, minim tep kun ak angņi mindpiyn. 8 Gor biynimb nuk gunap biynimb tep, yand bi timey ak pen, yip simb niņiy dek, Jiwda biynimb mer okok kuyip, Krays chinup direp yimb gip minim tep ak angņimbiyn. 9 Pen Gor miņmon gay, biynimb par okok kuyip kunep diniņgayn angak ak pen; chin minim kun ak nind ma niņiy, Jiwda biynimb gok kuyip nep diniņgamb anġiy niņnuk. Pen Gor yip diy anġek, biynimb paryomb okok kuyip angņen, Krays nup dipay ak mey, Gor wosrey giniņg niņayak ak gek miseņ niņbun. 10 Gip kun ak biynimb nuk kuņay mindyakniņ, enjol gok sek, Seytan, Kichekiy, tap gok sek niņiy; Gor bi gos tipanġiy niņimb ak anġiy niņniņgambay. 11 Nuk gip kun ak Biyomb chin Jiysis Krays nup, chinup yokniņg gos niņak rek nep gip. 12 Pen owak rek nup gosimb niņiy mey, Nop Gor nup ma pirikiy, monmon angniņbun. 13 Kun ak nimbip angņirangen, yip timey gey miker dipiyn ak, gos kuņay ma niņnimimb; ak nimbip biynimb tep yand anġiy miker dipiyn.

Krays Biynimb Wasemb Yimb Ayip

14 Ar kun ak Bapiy nup koņgim yimiy angniņbiyn. 15 Chin yikop ma mindombinup; Bapiy yomb mindakniņ chin kiņiņ keykey, semb biyoņ man biy mindpun. 16 Nup per anġniņiy apiyn, “Biyomb key yimb

mindpan. Kawnan nak ak, Yipiyses biynimb nip ker mindpay gok kuyip kond mindonimuj, ¹⁷⁻¹⁸Ñinak nup ma kirginiŋgiy; nup gosimb niŋyŋ chingiy nep mindeniŋgiy. Chingiy nep mindiy mey, nirapiy biynimb gok kuyip wasemb aypiy rek ak giniŋgiy. Miñ ak jakiy, am mon ak paŋg dek, kilis mindip rek ak niŋrep giniŋgiy. Pen nand wasemb aypan ak, pernep wasemb aypan. Yiy akyoŋ amiy, akyan amiy, akdoŋ amiy, akdoŋ amiy gip. ¹⁹Kun ak biynimb nand gok kuyip gos tep ñenimin, Krays biynimb wasemb ayip rek niŋy kunep giniŋgiy. Pen chin biynimb nep mindpun ak wasemb aypan rek maŋgiysek niŋjun rek ma ayip. Nirapiy bi tep key yimb mindpiyr. Pen nirip chingiy, nand wasemb aypan kun ak rek nep ayniŋgiy apiyn.”

²⁰Pen nimbip aŋgaysipiyn ñin ar nuk ak. Chinup direp giniŋgamb ak, key yimb direp giniŋgamb. Niŋy nup aŋgniŋjun ak pen; nuk bi key yimb ak, chin yip nep mindiy, key yimb giniŋgamb. ²¹Kun ak biynimb Jiysis Krays nup chingiy mindpun gok, yimb nup pernep dand aranyiŋ mindonjun! Tep.

Biyimb Krays Ker Gok Kiñiŋ Nokom Rek Mindpay

4 ¹Yand Krays ker minden yip kalambis ayey mindpiyn ak, minim yip ak niŋnimimb. Gor nimbip biynimb tep yand mindeyaŋ aŋgiy dak ak, mindrep yimb giyiŋ mindenimimb. ²Biyimb yomb mindpun aŋgiy kal ma jiwnimimb; biynimb sayn tep gok mindenimimb. Key penpen wasemb aypim rek, penpen direp giyiŋ mindenimimb. ³Gor Kawnan nimbip di jimñiy ayek, jimñiy mindpim rek; kun giy nep mindonjun aŋgiy gem amnimuj. ⁴Pen Kawnan ak nokom, chin biynimb kiñiŋ nuk ak nokom. Nuk yip mindrep giniŋgambun gos ak nokom. ⁵Biyomb chin ak nokom. Nup gosimb niŋep ar ak nokom. Niŋg pikpun ar ak nokom. ⁶Bapiy Gor ak nokom Biyomb chin mindiy; chinup maŋgiysek namb ay mindek, woŋg nup ak gipun. ⁷Pen Ñinuk Krays nup yokek apiy, kumiy tikjakiy chinup kond mindakniŋ, woŋg keykey aŋgip rek gipun.

⁸Kun ak Baybol buk ak tikiy aŋgyak:

“Nuk tikjak biyoŋ amyiŋg, bi nup miluk niŋyak gok kuyip taw dapyap ay, biynimb nuk gok kuyip girep yimb gak aŋgyak.”

⁹Nuk aranjak amnak aŋgyak kiñiŋ ak, yergiy rek mindip? Mey man ar biy apiy kumiy, tikjakiy aranjak amnak aŋgiy aŋgyak. Yikop ak yergiy aranjak ambikop. ¹⁰Kun ak chin niŋbun: bi man ar biy awak anep kumiy, tip aranjak amnak semb biyoŋ. Amiy, semb biyoŋ man biy maŋgiysek kond mindip.

¹¹Pen biynimb nuk gok kuyip direp yimb gak aŋgyak kun ak, biynimb nuk gok kond mindakniŋ, woŋg keykey aŋgayip rek gipay aŋgyak. Gunap aŋgayek, Jiysis minim dand amemb woŋg ak gipay. Gunap bi Gor minim aŋgep woŋg ak gipay. Gunap biynimb Gor nup gosimb ma niŋbay gok

kuyip minim tep ak aṅṅñimbay. Gunap biynimb nup dipay gok kuyip kond mindiy aṅṅñirep gipay. ¹²⁻¹³Biynimb nuk kond mindakniṅ, woṅṅ keykey gipay kun ak, biynimb kiñiṅ yand gok maṅgiyseṅ yip niṅrep giy, jimñiy mindrep gi dand amiy, Bapiy yip, kiyk yip minim bap ma mindonimuṅ aṅgiy gak.

¹⁴Gak ar kun ak mindon aṅgiy, ñapan sikoy rek ma mindon mey, bi Gor minim aspun aṅgiy yesek apay gok, chinup yinṅen diy solwara tungandik mandik gip rek ak ma giniṅgambay. ¹⁵Niṅrep giy, biynimb gok kuyip wasemb ay, minim niṅind yimb nep aṅgiy, Krays nup chinṅiy, nuk junwon rek mindeniṅgamb; chin mumbwak ñin kind tomb kind nuk gok rek mindeniṅgambun. ¹⁶Kun ak chin nup chinṅiy jimñiy mindiy, penpen wasemb ay, woṅṅ chinup keykey aṅgayip rek gon amek mey, maṅgiyseṅ mindrep giniṅgambun.

Krays Ker Mindpun Rek Miñ Kisenimb Ar Ak Ginjun

¹⁷Kun ak Krays nimbip dip ak niṅiy, biynimb nup ker ma mindpay gok gipay ar ak, kirginimimb. Gos kiyk ak yipund ma gip. ¹⁸Kiyk Bi chinup gek perper mindeniṅgambun anup kirgiy, nup gosimb ma niṅjun aṅgiy, biynimb sakiy rek ay, kisyim wip kind ak mindpay. ¹⁹Tap siy tap timey gun aṅgiy, nambiṅ ma diy, tapin monmon gey amjap.

²⁰Pen Krays chinup kun ak rek ginimimb aṅgiy ma aṅgak. ²¹Minim tep nimbip aṅgyak ak niṅbim: biynimb nup ker mindpun gok mind maṅgiy chin limginiṅgamb ar ak monmon ma giniṅgambun. ²²Tap siy tap timey ginjun aṅgiy niṅyiniṅgipun ak kirgiy, ²³gos tep kisenimb ar ak niṅniṅgambun.

²⁴Pen Gor gek biynimb kisenimb mindonjun rek ayip ak, miñ kisenimb ar ak diy mindenjun. Nind mindyiniṅgipun rek kirgiy, nuk mindrep gip rek ak mindenjun.

²⁵Krays biynimb nuk mindpim ak maṅgiyseṅ, keykey mindpim rek, mam ay gok kuyip yesek aṅgyiniṅgipim ak kirgiy, minim niṅind gok nep aṅgnimimb. ²⁶Miluk niṅmindem pumb paṅind amniṅgamb ak, Gor nup tep ma giniṅgamb. ²⁷Pen monmon gem, Seytan nimbip gos timey ñek, timey ginimimb rek ayip ak, niṅrep ginimimb.

²⁸Biynimb tap siy diyiniṅgipay gok siy ma diniṅgiy; key woṅṅ giy tap mindakniṅ, gunap biynimb yimgeprek gok kuyip ñiniṅgiy. ²⁹Minim aṅṅniṅ, minim timey gunap ma aṅgnimimb. Minim teprep biynimb niṅiy, Gor nup chinṅrep giniṅgiy rek aynimuṅ gok nep aṅgnimimb. ³⁰Gor chinup ñin kisen ak pisnep diniṅgayn aṅgiy niṅay, Kawnan nuk ak nind yokek apiy yip mindpun ak, timey giy nup miker ma ñinimimb. ³¹Simbwur timey gek, kaljiwiw, miluk niṅiy, biynimb aṅgiwiw, minim yomb aṅgiy gipim ak kirgiy, ³²penpen simb niṅiy, pen dek pen dek ginimimb. Nimb Krays ker mindem, Nop nimbip tap siy tap timey gipim ak niṅiy kirgip rek, pen niṅiy kirgek pen niṅiy kirgek ginimimb.

Melik Ar Ak Tanjonjun

5 ¹Nimb Bapiy Gor ñapan tep nuk mindpim ak, nuk gip rek ginimimb. ²Ñinuk Krays biynimb simb niñimb rek ak ginimimb. Chinup simb niñiy, Gor nup tap pik simbongiy akañ opriyñ tep ñimbay rek ak, chinup nen mon bak biyoñ kumak. Kun ak rek biynimb gok kuyip wasemb ayiñg mindenjun.

³Pen Gor biynimb nuk yimb mindpun ak, mindmangiy limgip rek ginjun angyiy, biyn siy bi siy ginjun angyiy akañ, chinup keynep tep giniñgamb rek gun angyiy, ma nep niñjun. ⁴Ñiñlon ay, kunep minim timey yesek yesek kun ak rek ma angjun. Gor bi tep angyiy, yimb nup anep dand aranjun.

⁵Niñrep gipun: biynimb biyn siy bi siy giy, monmon giy, chinup keynep tep ginimuñ angyiy niñbay gok; tap kuyip tep gip gok yomb rek ayek, Gor nup gosimb ma niñbay ak mey, Gor apiymiñay kuyip diy kond mindenimiyr rek ma ayip.

⁶Biynimb Gor nup kirpay gok yiwur yomb yimb diniñgambay. Kun ak minim monmon angyiy, nimbip yesek angñey niñnimimb rek ayip ak, niñrep ginimimb. ⁷Kiy yip tangyiy, minim kuyip ak ma niñnimimb.

⁸Nind kisyimnamb okok mindyiñgipim ak pen; miñiy Biyomb chin ak yip tangyiy, melik ar ak mindpim. ⁹Melik ar kun ak mindiy mey, yesek ma angyiy, timey ma giy, mindrep yimb giy mindeniñgambun. ¹⁰Kun ak Gor chinup niñek tep ginimuñ ar ak nep ginjun angyiy gem amnimuñ.

¹¹⁻¹²Weygiy kisyim kind okok tangyiy tap gipay ak, nimb yip ma ginimimb. Kiyk timey gipay ak; chin kun ak rek minim anep angun angon, nambiñ gip. Pen biynimb kun gipay gok kuyip angem, Gor nup timey gispay ak niñniñgiy. ¹³Miñmon yapek tap mangiysek misen niñbun. Kun ak rek Gor melik nuk apek, tap yerip weygiy gipay ak misen niñniñgambay. ¹⁴Minim bap tikiy angyak,

“Biynimb kisyim kind ak mindiy, sakiy giy kinjipim gok Krays nimbip sup ak puñgip nen; tikjakim angyak.”

¹⁵Kun ak biynimb gunap minim ma niñiy, monmon gipay rek ma ginimimb. Niñrep giy mindenimimb. ¹⁶Biynimb timey nep gipay ñin biy, chin Gor biynimb nuk mindpun gok mindrep ginjun. Mer ak, ñin chin biy yikop siliñg pandikniñgamb. ¹⁷Kun ak monmon ma ginimimb; nup tep giniñgamb ar ak niñiy ginimimb. ¹⁸Ñiñg kilis ñimbis, sakiy ma aynimimb; Gor Kawnan ak yip nep mindyiñg, gos tep ñimb rek ginimimb. ¹⁹Baybol buk minim Sam apay gok penpen angñiyiñg, kamep anggyiñg, minim tep nup anggyiñg ginimimb. Tep gakniñ, key niñbim rek Biyomb chin ak nup, minim tep gunap angnimimb. ²⁰Biyomb chin Jiyses Krays yip mindpun rek, minek minek yerer ginimuñ ak yimb nup angyiy, Nop nup tep angyiñg mindenjun.

Bi Beryongon Gok Kuyip Minim Angak

²¹ Biynimb nup ker mindpun gok Krays nup gosimb niñyĩng, penpen direp ginjun.

²² Nimb biyn gok Biyomb ker mindpim rek, nangumiy sikop angñĩngiy rek niñnimimb. ²³ Ar kun ak kun giy mindip: Krays biynimb gok diy kond mindip rek; bi gok biyn kiyk gok diy kond mindipay. ²⁴ Krays biynimb nuk gok kuyip angkek minim nup kisen gipay rek, biyn gok, bi kiyk gok angñĩngiy rek kisen giniñgiy.

²⁵ Pen nimb bi gok, Krays biynimb nuk gok mañgiysek wasemb ay monmon kumak rek niñiy, biyn nimbik gok kuyip kunep wasemb yimb aynimimb.

²⁶ Chinup biynimb nuk gok Gor yip mindeyañ anggiy, minim tep nuk ak sek, ñĩng ak sek gek, ²⁷ silik kiñowiñ akañ, minim sikoy gunap ma mindiy, teprep nep mindey kuyip dand amniñgayn anggiy gip. ²⁸ Nimb bi gok, biyn nimb gok kun ak rek ginimimb. Mumbwak nimb key niñrep gipim rek kuyip ginimimb. Bi biyn kiyk wasemb aypay gok; mumbwak nokom mindpiyr rek, mumbwak kiyk key wasemb aypay. ²⁹ Mumbwak chin ak yiruk ma niñbun; key niñon tep gek, tap keñmañgiy ñiyiñ ñiyiñg nep mindpun. Krays biynimb nuk kond mindip gok kun ak rek gip. ³⁰ Yenen: chin mumbwak ñin kind tomb kind nuk gok rek mindpun.

³¹ Pen Baybol buk ak tikiy anggyak, “Bi gok biyn diniñg, nonim nop kuyip kirgiy, biyn diy jimñiy mindiy, mumbwak nokom rek ayek mindipay anggyak.” ³² Minim kun ak junj bap mindek anggak. Yand niñiy aspiyn ak, Krays nuk mey junwon, chin biynimb nuk gok, ñin tomb kind okok rek mindpun. ³³ Pen nimb bi gok nokom nokom, mumbwak nimbik ak key simb niñbim rek, biyn nimbik gok kuyip simb niñnimimb. Nimb biyn gok nokom nokom, nangumiy sikop kuyip, bi chin anggiy kuyip direp ginimimb.

Ñapan Gok

6 ¹ Nimb ñapan gok, nap nanim sikop angñĩngiy rek niñdinimimb. Gor anggak miñ tep mey ar kun ak. ²⁻³ Nuk anggak, “Nap nanim sikop kuyip direp giy, angñimiy rek niñdinimimb anggak.” Pen minim kun ak anggiy anggak, “Kun giniñgambim ak kasek ma kumiy, man ar biy tapin mindiy, mindrep giniñgambim anggak.”

⁴ Pen nop nonim sikop, ñapan nimbik gok mindrep giyañ anggiy, kuyip sosim rek ma angñimimb. Kun gem, yiruk gek, minim angñiñgambim ak ma niñniñgambay. Pen yomb giyakniñ, gos wikrep giyiñg, Gor minim angñirep giyiñg mindenimimb.

Biyomb Gok Sek Bi Yikop Gok Sek

⁵ Pen nimb biynimb biyomb dap ayey kuyip yikop woñg giñimbim gok, Krays minim angkek pirikiy direp gipim rek; biyomb nimb lum ar biy gok kuyip kunep ginimimb.

⁶Biyomb gok niñmindyakniñ gon kuyip tep gañ aᅅgiy, woᅅg ma ginimimb; Gor nup gosimb niñbim rek, Krays nup tep ginimuᅅ aᅅgiy ginimimb. ⁷Biynimb lum ar biy kuyip nep gispun aᅅgiy ma niñnimimb; Krays Biyomb chin ak nup woᅅg gispun aᅅgiy, tep gakniñ ginimimb. ⁸Nimb niñbim: chin biynimb yomb akañ, biynimb yikop woᅅg giñemb akañ; Biyomb chin anup woᅅg girep goniᅅgambun, chinup direp giniᅅgamb.

⁹Pen nimb biyomb biynimb chinup yikop woᅅg giyañ aᅅgiy dap aypim gok; kuyip direp ginimimb. Minim kilis aᅅgem pirikyñg, woᅅg ma giniᅅgiy. Biyomb chin semb biyoᅅ biynimb maᅅgiyseᅅ kond mindip ak, biynimb gok yomb biynimb gok sikoy aᅅgiy ma niñimb. Andip andip mindpay ak niñiy, pis bap akañ pis bap ma amniᅅgamb.

Chim Yakam Gor Ñimb Ak Yisik Ayrep Giy Mindonjun

¹⁰Minim aᅅg day jiwniᅅg gispuiyn. Biyomb yimb anup chiᅅgiy, nimbip kond mindakniñ mindrep ginimimb. ¹¹Seytan chinup per timey giniᅅg gip ak; chim yakam Gor chinup ñimb ak kinjeᅅram ak ay niñmindrep ginimimb. ¹²Biynimb yikop gok yip ma penpen gispun: kichekiy malñiluk biyomb kiyk kiñiñ keykey semb biyoᅅ man biy mindiy, kisyimken tapay gok yip penpen gispun. ¹³Kun ak tap penpen giniᅅg aypay gok maᅅgiyseᅅ ayrep giy mindiy mey; ñin kosyam mindep ak apeᅅ, kilis giy nep mindem, tap gunap nimbip giniᅅgiy rek ma ayniᅅgamb. ¹⁴Kun ak Gor minim niñind yimb ak, ler rek pimbrیکنimimb. Kond ñaᅅgniᅅgambay aᅅgiy, tiᅅgliys wos aypay rek, Gor nup di wiᅅniᅅgan aynimimb. ¹⁵Tomb tirup aypay rek, Gor yip jimñiy mindep minim tep ak dand amnimimb. ¹⁶Kandiᅅ teᅅgiypay rek, chinup kond mindeniᅅgamb aᅅgiy nup gosimb niñmindem mey; nuk gek Seytan yakam nuk mon rek yinakniñ ñaᅅgniᅅgamb gok pisnep suᅅgniᅅgamb. ¹⁷Wis wos band aypay rek, Gor nimbip simb niñiy dip gos ak, di jun biyoᅅ aynimimb. Baynat kind dand ambay rek, Gor Kawnan nimbip minim ñimb ak dand amnimimb. ¹⁸Kawnan nuk gos ñakniñ, Gor nup minim ar keykey aᅅgniᅅyiᅅg mindenimimb. ¹⁹Yip kunep ma kirginimimb. Gor nup aᅅgniᅅgem yip kond mindakniñ, ma pirikiy, minim tep weygiy mindyiᅅgip ak biynimb gok kuyip monmon aᅅᅅñinim. ²⁰Minim kun ak nep aᅅgraᅅgenik yip kalambis ayeyak mindpiyn ak pen, nup aᅅgniᅅgem ma pirikiy monmon aᅅᅅñinim.

Minim Day Won Gunap

²¹Pen yand yergiy rek mindpiyn ak, mam tep chin Tikiykas, bi Gor nup woᅅg girep gip ak, amjakiy nimbip aᅅᅅniᅅgamb. ²²Mindpiyn rek, woᅅg gipiyn rek am aᅅgek niñiy, gos sek mindenimimb.

²³Bapiy Gor apiymiᅅay nimbip kond mindriᅅniñ, kuyipapiy gosimb niñiy, biynimb kuyipapiy gok wasemb ay mindenimimb. ²⁴Pen Gor nimbip biynimb Biyomb chin Jiysis Krays nup wasemb ayiᅅg nep mindpim gok, simb niñiy direp yimb ginimuᅅ.